



KANTONALNO TUŽILAŠTVO UNSKO-SANSKOG KANTONA

IZGRADNJA POVJERENJA KROZ TRANSPARENTAN RAD

BILTEN BR. 1

Broj I, Bihać, oktobar - novembar 2024. godine

IZDAVAČ: Kantonalno tužilaštvo Unsko-sanskog kantona

GLAVNA UREDNICA: mr. sci. Merima Mešanović, glavna kantonalna tužiteljica

UREDNICA: Irena Marjanović Čavkić, portparol

Riječi i pojmovi koji imaju rodno značenje, korišteni u ovom dokumentu, odnose se jednako i na ženski i na muški rod, bez obzira jesu li korišteni u muškom ili ženskom rodu.



Cijenjene građanke i građani,

U cilju blagovremenog informisanja javnosti o aktivnostima Kantonalnog tužilaštva Unsko-sanskog kantona, poštujući pravo građana na dostupnost relevantnih informacija, ali i propise o formi i načinu objavljivanja informacija, ovakvim suvremenim načinom komunikacije, želimo da kroz transparentan rad koji je ključan za izgradnju povjerenja i međusobnog razumijevanja zajedno ostvarimo naše ciljeve koji će doprinijeti izgradnji pravednijeg i sigurnijeg okruženja.

Kantonalno tužilaštvo Unsko-sanskog kantona će u skladu s jasno definisanim strateškim ciljevima u svom radu, nultom tolerancijom na svaki oblik uticaja na neovisan rad Tužilaštva od bilo kojeg pojedinca ili interesnih skupina težiti što efiksnijem i kvalitetnijem radu, kao i boljim rezultatima u ostvarivanju svoje funkcije u smislu stvaranja društveno odgovorne institucije koja će se na adekvatan način boriti sa svim oblicima kriminaliteta.

mr. sc. Merima Mešanović, glavna kantonalna tužiteljica
Kantonalnog tužilaštva Unsko-sanskog kantona

IZDVOJENE TEME

STRATEŠKI CILJEVI KANTONALNOG TUŽILAŠTVA UNSKO-SANSKOG KANTONA U PERIODU OD 2024. DO 2029. GODINE

Jedna od osnovnih funkcija tužilaštava je otkrivanje i gonjenje počinitelaca krivičnih djela, zbog čega tužilački sistem kao dio pravosudnog sistema Bosne i Hercegovine mora težiti što efikasnijem i kvalitetnijem radu i boljim rezultatima u ostvarivanju te svoje funkcije posebno u sferi organizovanog kriminala i koruptivnih krivičnih djela kao i adekvatnom sankcionisanju počinitelaca takve vrste kriminala kao i svih drugih oblika kriminala, a u cilju jačanja pravne sigurnosti građana i vladavine prava u Bosni i Hercegovini.

Strateški ciljevi u radu Kantonalnog tužilaštva Unsko-sanskog kantona u periodu od 2024. do 2029. godine u potpunosti su usklađeni sa sadržajem i oslanjaju se na strateške/planske dokumente koji se odnose na tužilački sistem

Federacije Bosne i Hercegovine i Bosne i Hercegovine, a naročito na:

- Reformski program Visokog sudskog i tužilačkog vijeća Bosne i Hercegovine za period 2021.-2023.godine,
- Strateški okvir za tužilački sistem Federacije Bosne i Hercegovine za period 2021. do 2023. godine,
- Strateške dokumente nacionalnog i međunarodnog karaktera kao i nalaze i preporuke izvještaja relevantnih međunarodnih organizacija od značaja za rad pravosudnog sistema Bosne i Hercegovine.

STRATEŠKI CILJEVI

SMANJENJE
BROJA STARIH
PREDMETA

POVEĆANJE
TRANSPARENT
NOSTI RADA I
UNAPREĐENJE
INTEGRITETA
TUŽILAŠTVA

POVEĆANJE
EFIKASNOSTI I
KVALITETA
RADA

UNAPREĐENJE
RADA S
POLICIJSKIM I
DRUGIM
AGENCIJAMA
ZA
PROVOĐENJE
ZAKONA

UNAPREĐENJE
RADA NA
PREDMETIMA
KORUPCIJE I
ORGANIZIRANOG
KRIMINALA

POVEĆANJE
KVALITETA I
KVANTITETA
VOĐENJA
FINANSIJSKIH
ISTRAGA


IZLAGANJE TUŽITELJICE INDIRE ĆUK NA ZAJEDNIČKOJ SJEDNICI KOMISIJA PARLAMENTA FEDERACIJE BIH O INSTITUCIONALNIM ODGOVORIMA NA NASILJE U PORODICI I RODNO ZASNOVANO NASILJE

Šefica Odsjeka za maloljetnički kriminal, seksualne i krvne delikte Kantonalnog tužilaštva Unsko-sanskog kantona Indira Ćuk izložila je pregled rada ovog Tužilaštva na predmetima nasilja u porodici u periodu od januara 2019. godine do septembra 2024. godine na zajedničkoj sjednici komisija Parlamenta Federacije BiH o institucionalnim odgovorima na nasilje u porodici i rodno zasnovano nasilje održanoj u Sarajevu, 17. septembra 2024. godine.

U navedenom periodu, od ukupnog broja zaprimljenih prijava za krivično djelo nasilje u porodici kod Kantonalnog tužilaštva Unsko-sanskog kantona, u 77,41% predmeta su potvrđene optužnice. Od ukupnog broja podignutih optužnica, u 67,7% predmeta su izrečene uvjetne osude, u 3,2% predmeta su donijete oslobađajuće presude, dok su u 11,69% predmeta izrečene zatvorske kazne. 17,41% predmeta je još uvijek u toku.



Histogram frekvencija prijava, optužnica, uvjetnih presuda, oslobađajućih presuda te zatvorskih kazni u odnosu na broj lica i broj predmeta nasilja u porodici (period od 2019. do septembra 2024. godine)



POTPISAN MEMORANDUM O SARADNJI S PRAVNIM FAKULTETOM UNIVERZITETA U BIHAĆU



17. septembra 2024. godine, u prostorijama Kantonalnog tužilaštva Unsko-sanskog kantona upriličeno je svečano potpisivanje memoranduma o saradnji između Pravnog fakulteta Univerziteta u Bihaću i Kantonalnog tužilaštva Unsko-sanskog kantona. Memorandum su potpisali glavna kantonalna tužiteljica Mešanović Merima ispred Kantonalnog tužilaštva i dekan Hamzabegović Suad ispred Pravnog fakulteta.

Potpisani memorandum ima za cilj uspostaviti saradnju ove dvije značajne institucije kroz studentsku praksu i program stručnog osposobljavanja studenata Pravnog fakulteta.

Kantonalno tužilaštvo će staviti na raspolaganje prostor, vrijeme i profesionalne usluge službenih lica u svrhu ostvarenja ovih ciljeva. Memorandum je potpisan na period od dvije godine.

Smatram da Kantonalno tužilaštvo Unsko-sanskog kantona kao pravosudna institucija ima društvenu odgovornost da učestvuje u obrazovnom procesu budućih generacija pravnika i danas potpisani memorandum odraz je ispunjavanja te odgovornosti – naglasila je glavna kantonalna tužiteljica Mešanović Merima.

Želim izraziti izrazito zadovoljstvo potpisanim memorandumom i uspostavljenom saradnjom. Znam koliko je našim studentima bitno sticanje ne samo empirijskih već i praktičnih znanja, te je time ovaj memorandum još značajniji – poručio je dekan Hamzabegović Suad.

Potpisnice su izrazile želju za nastavljanjem dobre saradnje i proširenjem iste na nove projekte u budućnosti.



U PROTEKLOM PERIODU ODRŽANO NEKOLIKO SASTANAKA SA STRATEŠKIM PARTNERIMA



PREDSTAVNICI AMBASADE SJEDINJENIH AMERIČKIH DRŽAVA

26. septembra 2024. godine Kantonalno tužilaštvo Unsko-sanskog kantona posjetili su rezidentni pravni savjetnik za Bosnu i Hercegovinu u okviru Ministarstva pravde SAD-a Frank Bradsher i pravna savjetnica Daniela Đerić. O unaprijeđenju rada na predmetima korupcije i organiziranog kriminala s predstavnicima Američke ambasade razgovarali su glavna kantonalna

tužiteljica Merima Mešanović i tužioci Kantonalnog tužilaštva Unsko-sanskog kantona koji rade na ovim predmetima Kemal Kapić, Senka Delić i Deni Odobašić. Uvaženi gosti su izrazili zadovoljstvo ranije uspostavljenom saradnjom i iskazali bezrezervnu podršku Ambasade SAD-a Kantonalnom tužilaštvu Unsko-sanskog kantona u borbi protiv korupcije, privrednog i organiziranog kriminala.

RUKOVODSTVO SUDSKE POLICIJE U FEDERACIJI BIH I UNSKO-SANSKOM KANTONU

12. septembra 2024. godine u prostorijama Kantonalnog tužilaštva Unsko-sanskog kantona održan je radni sastanak s rukovodstvom Sudske policije u Federaciji Bosne i Hercegovine. S gospodinom Grošo Dženadom, direktorom Sudske policije i gospodinom Ćatić Senadom, načelnikom Centra Sudske policije Unsko-sanskog kantona razgovarala je glavna kantonalna tužiteljica Mešanović Merima. U fokusu radnog sastanka bili su sigurnosni i drugi izazovi s kojima se suočavaju tužioci i Kantonalno tužilaštvo Unsko-sanskog kantona kao pravosudna institucija u cjelini. Razmatrale su se mogućnosti unaprijeđenja rada Sudske policije i podizanja nivoa sigurnosnog ambijenta u radu Tužilaštva.

U cilju što efikasnijeg ostvarivanja nadležnosti Tužilaštva, potrebno je podići nivo sigurnosti rada, u čemu će Sudska policija imati ključnu ulogu – zaključili su sugovornici.





FORUM MINISTARSTVA UNUTRAŠNJIH POSLOVA USK I KANTONALNOG TUŽILAŠTVA

U prostorijama Kantonalnog tužilaštva održana su dva sastanka operativnog Foruma koje čini rukovodstvo Tužilaštva i rukovodstvo Uprave policije Ministarstva unutrašnjih poslova Unsko-sanskog kantona. Sastanci Foruma se održavaju posljednjih deset godina, dok je na posljednja dva održana u junu i avgustu zaključeno kako

je potrebno intenzivirati saradnju članica u cilju što efikasnije borbe protiv svih oblika kriminaliteta.

Direktor Uprave policije Unsko-sanskog kantona Amel Kozlica i načelnica Sektora kriminalističke policije Snežana Galić prvenstveno su upoznali prisutne sa sigurnosnom situacijom u Kantonu. Fokus razgovora bio je i na procesu istraživanja i dokazivanja krivičnih djela nasilja u porodici i proizvodnje i stavljanja u promet opojnih droga. Sudionici su iznijeli i problematiku osiguranja dokaza u predmetima gdje su svjedoci i počinioci članovi migrantske populacije.

Na sastancima su iznijete informacije prema kojima je u 2024. godini u saobraćaju na području Unsko-sanskog kantona zabilježeno devet smrtnih posljedica, dok su cijeloj prošloj godini zabilježene tri. *U pogledu saobraćaja i krivičnih djela protiv sigurnosti saobraćaja potrebno je prije svega djelovati preventivno i edukativno* – zaključili su članovi Foruma.

Sudionici su se složili da je potrebno prioritarno postupanje svih aktera u predmetima korupcije, a naročito u onima koji su označeni kao predmeti visoke korupcije.

PREDMETI U FOKUSU

TROSTRUKO UBISTVO U SANSKOM MOSTU

U jutarnjim satima 21. augusta 2024. godine dežurna tužiteljica Područnog tužilaštva Sanski Most Kantonalnog tužilaštva Unsko-sanskog kantona je obaviještena da je došlo do pucnjave u Srednjoj školi u Sanskom Mostu kojom prilikom je jedno lice iz vatrenog oružja lišilo života tri zaposlenika ove škole, a potom pokušalo samoubistvo. Odmah po saznanju za navedeni događaj, Kantonalno tužilaštvo Unsko-sanskog kantona je oformilo tužilački tim, na čijem čelu je šefica Odsjeka za ratne zločine, krivična djela protiv života i tijela, te zaštićenog sistema elektronske obrade podataka, koji je na licu mjesta rukovodio uviđajem. Osumnjičeni za ovo teško krivično djelo je istog dana hospitaliziran u Univerzitetskom kliničkom centru u Banjoj Luci. Narednog dana, u prisustvu tužilačkog tima koji rukovodi istragom, u Kantonalnoj bolnici "Dr. Irfan Ljubijankić" u Bihaću, izvršene su obdukcije tijela žrtava.

Osumnjičeni je 02. septembra 2024. godine otpušten s liječenja, a odmah zatim lišen slobode. Nakon kriminalističke obrade ispitan je od strane postupajuće tužiteljice koja je stavljajući mu na teret trostruko ubistvo i nedozvoljeno držanje oružja uputila prijedlog Kantonalnom sudu u Bihaću za određivanje mjere pritvora. Pritvor koji je osumnjičenom određen 04. septembra 2024. godine, u međuvremenu je produžen na prijedlog Kantonalnog tužilaštva Unsko-sanskog kantona.

Istraga u ovom predmetu se nastavlja prvenstveno provođenjem odgovarajućih vještačenja, ali i drugih istražnih radnji koje imaju za cilj da utvrde potpuno i pravilno činjenično stanje, uključujući i motiv počinjenja ovog krivičnog djela.

NAKON ŽALBE TUŽILAŠTVA IZREČENA DUŽA ZATVORSKA KAZNA ZA NASILJE U PORODICI

Kantonalni sud u Bihaću donio je drugostepenu presudu kojom je G.H. iz B. P. pravosnažno osudio na kaznu zatvora u trajanju od 1 godine i 2 mjeseca zbog nasilja u porodici prema vanbračnoj partnerici s kojom živi u zajedničkom domaćinstvu. Ovakva presuda rezultat je žalbe Tužilaštva Unsko-sanskog kantona na prvostepenu presudu Općinskog suda u Bihaću kojom je prvobitno izrečeno 8 mjeseci zatvora za predmetno djelo.

Dokazano je da je osuđeni, počev od kraja decembra 2023. godine pa do 12. februara 2024. godine, u B. P., u stanu u kojem živi sa vanbračnom partnericom Z. H. i njihovim desetomjesečnim djetetom te njenom četverogodišnjom kćerkom, svjestan da nasiljem, drskim i bezobzirnim ponašanjem ugrožava mir, tjelesnu cjelovitost i psihičko zdravlje svoje vanbračne partnerice s kojom živi u zajedničkom domaćinstvu i htijući to, istu više puta u prisustvu djece fizički zlostavljao na način da ju je udarao šakama u predjelu glave i tijela, psujući joj majku, govoreći da je kurva i da se prodaje za novac, uz kontinuirane prijetnje da ga ista ne smije ostaviti i da ga ne smije prijaviti jer će „završiti kao ona žena u Gradačcu“ i da će ubiti njihovo zajedničko dijete.

Nakon prvostepene presude kojom je osuđenom izrečena kazna od 8 mjeseci zatvora, kantonalna tužiteljica je u žalbi između ostalog isticala da utvrđena kazna zatvora za predmetno krivično djelo ne nalazi mjeru i opravdanje da se istom može postići svrha kažnjavanja zbog težine krivičnog djela i načina na koji je isto počinjeno, kao i da nisu na adekvatan način cijenjene okolnosti da je nasilje prema oštećenoj kontinuirano činjeno pred djecom, a naročito prijetnje oštećenoj da će „završiti kao ona žena u Gradačcu“ ako ga prijavi ili ostavi (ubistvo Nizame Hećimović).

U BLIZINI BIHAĆA PRONAĐENA VELIKA PLANTAŽA MARIHUANE

15. avgusta 2024. godine na području Teočaka u Bihaću pronađena je velika plantaža za uzgoj opojne droge *cannabis* (marihuane) s 3000 stabljika. Po nalogu i pod nadzorom dežurnog tužioca Kantonalnog tužilaštva Unsko-sanskog kantona, pripadnici Sektora kriminalističke policije Ministarstva unutrašnjih poslova uz asistenciju pripadnika Jedinice za specijalnu podršku i nadležnih policijskih stanica, izvršili su pretres i uviđaj pomenute lokacije. Pretresom je pronađena veća količina suhe zeljaste materije koja asocira na *cannabis*, oprema za uzgoj *cannabisa*, kao i drugi predmeti koji su izuzeti, a koji mogu poslužiti kao dokaz u daljnjem postupku. Na navedenoj lokaciji slobode su lišena 3 lica.

Na prijedlog Kantonalnog tužilaštva Unsko-sanskog kantona, 18. avgusta 2024. godine Općinski sud u Bihaću donio je rješenje kojim se trojici osumnjičenih određuje jednomjesečni pritvor zbog postojanja osnovane sumnje da su neovlašteno proizvodili i stavljali u promet opojnu drogu, te zbog postojanja okolnosti koje opravdavaju strah i bojazan da bi boravkom na slobodi mogli ponoviti isto krivično djelo. U međuvremenu, na prijedlog Kantonalnog tužilaštva Unsko-sanskog kantona Općinski sud u Bihaću produžio je osumnjičenima pritvor za još dva mjeseca. Istraga u ovom predmetu se nastavlja.



KANTONALNO TUŽILAŠTVO UNSKO-SANSKOG KANTONA

Bosanska 2, 77000 Bihać

Tel: 037/222-252
